

四庫全書

集部

欽定四庫全書

集部

敬軒文集卷三

詳校官編修_臣翟槐

中書_臣劉源溥覆勘

總校官庶吉士_臣何思鈞

校對官中書_臣李斯咏

謄錄監生_臣朱坦

欽定四庫全書

敬軒文集卷三

歌行

杜鵑行

明 薛瑄 撰

昔讀古人書知有杜鵑名今泛沅江舫始聞杜鵑聲杜鵑生子不自哺野老相傳之語如少陵惟有古來稱望帝變化無端竟茫昧吾意百鳥相推尊亦如蜂蟻君臣

義氣化感物不自由四月五月聲喧啾一聲未了聲轉
急千林萬壑波濤秋遠客扁舟睡難著兩耳還遭杜鵑
聒歸心一夜憶虞廷鳴鳳時應集阿閣

續杜鵑行

杜鵑變化有無寧復論百鳥之中乃為衆鳥尊以茲少
陵托忠憤再拜謂是古帝魂我來何處聞逸響扁舟夜
泊沅江上林霏拂岸灘風清峽影沈波江月朗乍遠乍
近鳴未休聽之轉急如有求遠客毋勞厭惱聒少陵忠

義方難儔

壺頭歌

沅水南來幾千里亂石激濤蹴空起急捎官舫上巉巖
閒倚驛樓看山水隔江萬疊雲峰稠一峰平立名壺頭
云是伏波駐兵處至今石室留山陬憶昔炎網斷如縷
草竊紛然據寰宇寧知田牧隱奇才揮斥奸庸識真主
西征實藉聚米忠南伐誰比銅柱功中興諸將數籌畧
直與賈鄧爭英雄老身甘向邊陲歿誓掃羣蠻靜坤軸

壺頭戰死非無情天遣英靈鎮南服跳梁小丑胡為哉
竟因遺筭稽顙來雖云未雪薏苡謗白璧本自無纖埃
昔於青史歎高識今向荒山訪遺迹怒濤猶帶薄伐聲
愁雲似是忠憤積馬侯馬侯真丈夫大器自與凡材殊
廟食勲名幾千古英風激我章句徒

驄馬行春歌為陳侍御賦

五百啓運天地清羣賢奮翼風雲生九重治理達遠邇
王度實藉執法明同年才子青雲客意氣昂昂超等列

孤松聳壑見高標一鶚橫空歎奇絕今年持節辭金臺
青驄蹀躞萬里來乃知霜雪達陽馬蹄到處山花開
邂逅沅陽話疇昔昔曾聯步趨丈石豸冠已覺凝秋霜
繡服還應絢朝日沅陽憲署情何多連床對榻同吟哦
吟哦未已欲將別索我驄馬行春歌愧我詩才劣韓杜
長篇險語急難就強操紙筆為君題掛一何止於萬漏
驄馬驄馬登周行攬轡直擬清四方發奸凜凜息豺虎
洗冤藹若回春陽古來豪俊皆如此陳言雅欲追芳趾

相將努力篤忠勤圖取英聲耀青史

歌風臺歌

素靈夜哭秋郊月漢祖吳鉤三尺血芒碭雲氣從飛龍
咸陽竹帛隨烟滅獨屈羣策驅羣雄漢中一旅紅旗東
韓郎對語識成敗董公遮說開天衷王者之師仁以武
諸侯効順力如虎關河百戰芟羣雄垓下一歌散強楚
風塵盪滌天下清萬乘不忘布素情黃屋歸來見鄉邑
宴飲父老如平生酒酣拔劍高歌起歌詞激烈振天地

雄志深知大業難霸心尚思猛士倚羣兒逐和聲悠揚
起舞四顧何慨慷樂極哀來淚沾臆魂魄千秋思故鄉
遂令此邑為湯沐獨承天寵何優沃四百休運同始終
三國遺民想興復至今有臺泗水濱雄豪一去餘千春
壞埽層層積蒼蘚平原漠漠生黃塵我來正值清秋暮
桑柘蕭蕭葉飛雨泗水南流芒碭高霸業王風復何許
徘徊重是古帝郊摩挲石刻心勞焦俯仰秋天莽空濶
杳杳鴻鵠凌風高

昆陽行

策馬從北來南涉沙河渡登岸得平原極目風景暮暮
天落葉何縱橫翻翻亂觸馬足鳴蒼山無數昔人遠前
瞻忽及昆陽城城南湟水流域郭英雄事業猶如昨白
水真人在側微謹厚伊豈常情度是時炎運寒如灰五
威使者車奔雷慘慘三精雲霧塞蕭蕭九縣颼風回真
人一怒奮神武手握赤符興義旅昆陽大戰開天功烏
合如林散何許吾想當日嚴殺多洗兵雷雨何滂沱湟

川倒流虎豹伏亂麻屍積山嵯峨自爾威聲震天地克
魁惡黨覓飄逝夏后周宣果再興成功磊落光前世悠
悠此事千餘年至今父老猶相傳我來正值太平日戰
地盡作桑麻田生平遊覽好奇特徘徊弔古中腸熱舉
鞭一笑寒天高萬里關河坐超越

襄陽歌

持節過樊城南渡漢江曲漢江遠自蟠冢來遙望真如
鴨頭綠江干樓堞何崢嶸壯哉快覩襄陽城少日常思

一遊覽今朝始遂來經行經行處處多遺跡滿目蒼然
悲思集後人遊似前人遊古人憶是今人憶鬱鬱峴山
翠遙遙鹿門深殘碑人墮羊祜淚隱居誰識龐公心龐
公一去已千古尚有清風灑寰宇茂林烏宿魚潛淵區
區劉表焉能取城南習家池池水清漣漪當日山翁酩
酊醉風流未許他人知更尋王粲宅留井峴山麓銅瓶
無復汲深寒蔓草空餘覆幽綠悠悠往事難具陳高名
尚有隆中人師出二表鬼神泣圖成八陣風雨頻乃知

襄樊士風好由來英達何草草漢水東流峴首高祗因
配此名不了方今明聖坐垂旒百年禮樂登虞周仁恩
已滿天地大王化久浹江漢流江漢遊女心如結士習
詩書仰先烈烏臺使者來作歌期與國風傳不歇

過鹿門山

西來漢水浸山根舟人云此是鹿門峭壁蒼蒼石色古
曲逕杳杳藤蘿昏亂峰幽谷不知數底是龐公栖隱處
含情一嘯江風清雙櫓急搖下灘去

遊沅州城南

迴環綠水流城隄出門一顧心懽怡連林竹樹獻蒼翠
緣江梅柳爭芳菲和風蕩耳沸簫鼓晴日照水流旌旗
沅湘信美匪吾土中州久客還思歸

寄韻丈林侍御

前年掛席趨北斗九月泊舟都門口繡衣人是同鄉人
騎馬江邊問行久龍江驛裏同徘徊呼酒飲我何壯哉
興酣往事真草草願傾東海添樽壘別後倏忽幾寒暑

吳江木落洞庭雨，黔巫東望山嵯峨。
恨不高飛插翎羽，丈夫本是重四方。
眼底道路如尋常，風帆早晚上吳會。
仍尋舊約歌慨慷。

寄朱侍御歌

吾觀古來磊落大丈夫，致身特達自與凡才殊。
若不功作霖雨潤枯槁，便當手持玉斧清寰區。
二者都應不可得，大田可稼長川漁。
生平抱此心耿耿，爛讀古書極馳騁。
中年濫騎烏府驄，幾載蠻荒苦便靜。
忽聞按部同官

來江山六月霜風回樓舡彈壓湖湘百怪息憲節蕩拂
溪洞雲烟開是時思得懽然一相遇何意黃鵠東飛燕
西去令人凝望佳節過開盡冬梅老春樹春樹纖纖柔
榮多沅江江上浩烟波喜得瑤華好音信興來獨立東
風歌歌成寫寄憑雙鯉心事非公復誰理會合悠悠自
有時還期高議金門裏

黔陽江行歌

黔江轉急勢未已兩岸蒼崖削天起官船雙櫓疾於飛

倏忽雲林過百里生平膽氣尤崛竒三年蠻徼甘奔馳
惡灘險浪不經意白日自保公無私空囊敝篋一何有
滿束古書置前後船牕豁達涵虛明書中得意寧容口
忽憶江山千古長不知何日開鴻龐陰陽爭勝鬼神急
造化不停真宰忙千竒百怪氣參錯輕飄重墜奠清濁
三光宣精四海明五行順序百卉作有物不名復不凋
泯默萬化常超超眼底江山未為壯大地比是猶毫毛
感此人生浪自苦萬事悠悠隨所與放歌一曲南風來

坐對青天兩無語

鶴山小隱

大江之右多奇峰天台遠與羅浮通鶴山蒼蒼在何許
嘉名獨擅東南雄中有隱士好事者作圖遠寄烏臺下
烏臺柱史隱士交持卷索我揮狂毫開圖指點山佳處
峭壁迴巒簇烟樹澗花流出山中春松風掃遍溪頭路
數椽茅屋何蕭然白雲簷宇常周旋讀易已了嘉趣趣
作詩或賦招隱篇此境初從柱史說令人掩卷想奇絕

振衣千仞或可期萬里雲霄坐超越

齊都歌

偶把漁竿來渭水諸侯八百從如蟻洗兵一雨天下清
興王事業應難比茅土之封東土侯奄有青濟都營丘
千乘龍旗照滄海百層雉堞臨淄流淄流拂曙歌鐘起
人物喧闐隘都市黃金白壁酬君公文馬雕軒覲天子
前朝後市何輝光歌臺舞榭遙相望長劒危冠盛皋虎
珠廉繡幕圍姬姜伯業相傳僅千載寧知時去繁華改

盜賊公然竊寶弓坐令青社無光彩是非得失俱悠哉
空餘廢址連荒臺往事淒涼不可問溜流鳴咽悲風來

古松怪石歌

山東憲署兩絕奇古松怪石相蔽虧耳畔或聞海濤作
眼中不見雲根移皮皴鱗蘖溢寒雨霜雕雪刻莓苔聚
方驚白日起潛蛟更訝幽陰踞虬虎因憐二物爭豪雄
壯顏毅色孰與同閱世不今亦不古回頭幾覺凡物空
岱宗千尺雲崑崙一勺水安得良工為我寫此松石圖

坐携造化入袖裏

懷忠堂為都指揮李進賦

將軍樹勛起雲中結髮慷慨從飛龍幾年擁節驅羆熊
扶桑日出西崆峒旄頭射落天山空青海不復烽火紅
仁義之將良可宗丈夫不數衛霍功時清包裹刀與弓
八蠻入貢重譯通竭來分閫何從容敦崇詩禮輕豪豐
所居之堂名懷忠懷忠事業應無窮我雖儒冠心頗雄
寸管不讓三尺鋒等閒裨補造化功擬今四海歌皇風

懷忠將無與君同

登州行

驄馬曉辭萊子國北上高岡俯遼碣遼碣萬里天風寒
山溪二月凌澌結空濛極目春無邊春濤洶洶搖春烟
還從絕嶺下長坂高城忽起滄溟前滄溟倒浸紅樓影
通衢豁達塵埃靜已應持節是明時况復觀風得佳境
天開海闊霜臺高霜臺遠思何飄飄巨鰲戴山真浪語
大方見笑非虛謠乾坤俯仰高歌起有物無名大莫比

瀛海茫茫未足誇真是人間一泓水

望海歌

我生足迹半天下
謁來持節臨東夏
萬里滄溟入壯觀
洞庭彭蠡足驚詫
三韓之西日本東
元冥少昊迴祝融
歸墟尾閭杳難測
清江碧漢來無窮
碣石依稀望中小
天台不斷連山繞
烟波明滅散羣鷗
雲水空青浮衆島
扶桑漸覺明朝暎
還從海底昇金盆
太陰滅盡清輝發
羲和穩駕波無痕
有時颺母逞神武
馮夷擊鼓百怪舞

白浪戕戕摧雪山黑霧茫茫漲天宇三山六鰲安在哉
祖龍已去劉郎來樓船不復返秦使雲帆更欲尋蓬萊
雄豪千古俱淪沒唯有潮聲尚如昨從誰海上論盈消
獨倚蒼山看寥廓

東平行臺十五栢

行臺臺上十五栢一一皆抱梁棟姿自應生長得元氣
更當培植需良期孔明廟前今在否才大空聞少陵語
何如此木生中原萬牛不用可立取

送王秀才省兄歸京師

海右傳聞此亭古亭中送客豪英聚清風入座華筵開
流霞滿眼金杯舉是時霜落天宇高岱宗南望干雲霄
况復齊川走滄海三山恍惚連六鰲山竒海壯環名邑
落落高懷感今昔琬琰難酬北海詞風雨寧如少陵筆
想當促膝茲亭中飄飄逸氣凌長空至今草木生光彩
名將山水傳無窮皇明文運超唐李鳴鳳高岡鳴不已
王君之府玉堂仙清秩仍兼舉三禮難兄早擢賢良科

內臺執法平不頗竭來海岱振風紀王君柰此想思何
鴻鴈聯翩暫相接又是離亭動行色蕭疎荷芰颭秋波
凌亂桑榆下霜葉王君王君我所竒不須懷古傷分離
但願塤箎迭相應一門清譽流無期

瑯琊行

正統六年夏五月予奉勅過諸城其地即古瑯琊
郡追念古迹湮沒而喜今之民物寧熙是皆國家
深仁厚澤培養休息之所致因賦瑯琊行以紀

之

秦祖瑯瑯臺坡老超然臺兩臺千古兩寂寞但見參差
雲木山崔嵬我行正值四海昇平日千里連城萬家邑
烽堠花開火不驚林園麥秀雉爭集茫茫一氣天無私
山川民物皆欣熙三事小臣効精白九重聖主方無為
但願此景垂過億萬載天為城郭地為海人間無處不
春臺蘇刻秦碑真戲乃

山水圖為趙給事賦

黃門給事好事者一幅江山誰為寫雲霧波濤滿眼生
坐覺襟懷自瀟灑衡廬倚疊岷峨高洞庭彭蠡洲渚交
又疑雪消蜀水來黃牛白馬增春濤細看清濁分天地
地脉山形宛相際良工妙奪造化工白浪青林走雲氣
緣江細路古木齊耳畔似聞幽鳥啼倚岸扁舟久將濟
入雲茅屋誰同栖江草山花不知數採芳未是良辰暮
英靈不聞澗谷歌仁智自諳水山趣憶我昔遊天下時
跋涉險阻探清奇何如此圖不出戶勝槩一覽無所遺

送趙大參之浙江

浙右新參拜天寵
趙君籍籍聲名重
曉辭仙仗出都門
驂騑塞道香塵擁
交遊送別情何多
離筵正值東風和
山先入坐水侵席
柳條弄色花滿柯
花前罷酒官橋遠
潞水開帆驛程轉
九重金闕尚馳情
千里吳山行在眼
吳山自昔稱繁華
居民比屋過萬家
西湖烟淨拭明鏡
海門潮起翻銀沙
復有孤山號清境
清溪淺露疎梅影
處士不作封禪書
節與孤山共高聳
大藩形勝甲南東

好山不盡湖江重
薇垣軒豁挹清氣
使符出入宣皇風
皇風正是全勝日
聖明側席求賢急
方期禮樂過百王
直使仁恩涵八極
趙君好體軒堯心
嘉禾莫使螽蟊侵
旬宣他日有成績
策勛還作商家霖

送盧知縣致仕歸金華

高秋九月都門道
冠蓋光輝耀晴昊
離筵觴酌送者誰
花縣郎官乞身早
郎官自是青雲姿
飛騰况值明盛時
著書東閣見才俊
之官南國憐英奇
英奇未了哦松興

鶚薦陞官播佳政單父橫琴今幾年故里懸車想三逕
三逕乃在金華阿金華山水名且多繞戶清溪漱寒玉
當窻秀嶺橫烟蘿到家盡得溪山趣交友過從樂相語
為言壯仕老歸來此是天恩最深處

題羅侍御仙舟出峽圖

御史新圖妙難比畫船秋泛瞿塘水瞿塘水束三峽深
兩岸削鐵虛無裏虛無難辨峯頂高白雲林壑生虛濤
陽臺何處笑荒幻陣圖回首思雄豪雄豪一去幾千載

壯志何須增感慨自知多角邪可觸不為損聲淚空洒
東行更飽湖海觀繡衣不日朝金鑾覽君此畫動清興
扁舟便欲相追攀

題羅御史驄馬行春圖

青驄蹀躞長風起蜀道南來八千里攬轡不覺羣山高
釵閣裁眉平若水行邊正值韶光濃千巖萬壑花爭紅
晴霄麗日照旌節芳郊草軟搖玲瓏三川玉斧巡將遍
父老懽傳喜相見瘴厲都從淑氣消陰寒總逐陽春變

陽春本自天上來行春此日何壯哉還從畫圖識神駿
迴鞭却上黃金臺

張忠定公祠

乖崖自是奇人物兩迴走馬定西蜀纔驚錦水雲飛揚
坐見雪山峯突兀龍劍破匣搖寒芒斬艾荆芥驅天狼
父老但知歌舞樂黎庶不覺科徵忙鐵心一念真能止
侍女三年猶處子乃知金石誠可通遂使西人信如此
功成拂袖歸幾年深惠化猶相傳蛟龍上天風雨急

聲名垂世日月懸至今西人感公德牲醑年年進公室
迴頭却笑鄙猥徒身名泯泯無遺跡

寄題廣漢張魏公讀書巖

廣漢之山甲西蜀聞有石巖在山麓想當英傑未遇時
攜書獨向巖間讀巖間日月閒且長遠從虞夏窺黃唐
幽探造化鬼神變明察典禮人道常古書遍讀飽經濟
一朝適與風雲際社稷頻將赤手扶砥柱不逐洪波逝
金輪騰蹕乾與坤冥冥九宇皆兵氛要除和議正人極

誓迎北轍歸中原其如讒口增萋斐一斤南荒垂二紀
容光雖荷天開明孤忠竟與時已矣俯仰於今幾萬秋
名將江漢無停流思公招公公不起遙想寒巖添我愁

西蜀歌

天險不可升地險猶可登西蜀之山盤亘大地幾萬里
層巒疊嶂危峰峭壁何峻嶒西嶺我我太古雪巫山蒼
蒼曉雲白北有劍閣中天削出石門高南有我眉凌空
黃緣鳥道窄羣山合沓險遠不可窮危梯側逕無不相

連通梗楠松栢古木不知數攢巒架壑陰森翳鬱起烟
霧野花澗草亂雜難具名紛葩蒙茸齊霑天雨露熊羆
虎豹猿狖相與為羣曹幽禽怪鳥雄飛雌遶各以時鳴
號蜀山草木鳥獸之環奇也如此登高一望但見千里
百里峯巒湧翠如海濤中有長江橫界井絡域發源岷
麓東注滄溟無底谷深山幽壑溪澗千萬支穿林絡石
竟與岷江共聯屬蜀水行地山入雲東連吳會西崑崙
梁州舊是禹跡九州地誰言自古隔絕不與通中原憶

我總角年曾來到西川惟時記一不識百白頭迴想空
茫然前年丹詔下田里布衣走馬見天子擢官便作大
理丞持節重到三川裏三川山水得縱觀笑睨重險輕
狂瀾不為三峽狷鳴墮清淚不為五夜鵑啼慘旅顏老
讀古書破萬卷物理深深頗窺見大莫大於天無際眼
中山水足驚羨慨此悠悠險隘區一分一合千古餘奸
雄割據奴輩爾干戈盜弄鼠子如獨想南陽老諸葛三
顧茅廬魚水合復漢功留二表中出師星向五丈落至

今廟食錦水頭討賊忠義垂千秋下視紛紛草竊盜名
字泯沒何異狐鼠漸腐埋山丘只今天開明運四海為
家日岷江安流道途夷坦險阻失我作歌詞紀載混一
全盛時期與江山永永傳無極

題劉都憲山水圖

誰寫新圖妙難比疊嶂連峯向天起逼人已覺爽氣清
入眼渾疑暮光紫綠山細路分高低雲林遠近何參差
晴崖杲杲風日白陰壑慘慘雷雨迷沙水微茫繞山脚

半空飛瀑銀河落山光水色交清輝
世外塵氛盡消豁
憶我壯遊大地中名山歷覽千萬重
良工巧奪真宰意
雲氣恍與諸山通
劉侯家在江南住
正在此圖好山處
開門只見金芙蓉
散倚青霄不知數
侯今官已都憲
臺家山尚自縈高懷
匡時未許賦歸去
觀圖且喜清風來

題鄭侍郎蓮鷺圖

高堂忽見華山頂
十丈仙花開玉井
新梢出水藕橫船
圓葉當空蓋欲影
紛披花葉相交加
綠雲片片連紅霞

疑是瑤池宴仙子酒酣肌理無纖瑕何處紛然下羣鷺
佇立相呼復相顧六足聯拳方比翼一喙低遲還獨步
銜魚仰視空外來故知兩意無嫌猜參差九鷺態度別
紅蓮香裏同徘徊徘徊毛羽勝霜雪散布蒼烟幾點白
渾如野鶴出塵埃迴視凡禽迥殊絕匪獨九鷺祭有光
就中飲啄性亦常不比飢鳶得腐鼠仰首却嚇孤鳳凰
無限鷗鷺與鷹隼爪觜銛利性貪忍何如此鷺純且真
不搏不擊意深穩誰哉巧奪造化工花鳥幻出丹青中

潔白真堪比君子還歌振鷺鳴西雝

題角鷹圖

疑是楚公戴角鷹寫出神氣何稜稜健如熊虎一心猛
快若風火六翮輕曠野秋高草蕭瑟百萬雄師大獮獵
合圍已見三面齊翻韝似覺千里窄縱橫搏擊鳥獸羣
風毛雨血何紛紛雲裏鷗鵬尚須避草中狐兔寧復論
罷獵歸來立高樹似聽風飈欲飛去安得真骨殄鷗梟
長見鸞鳳在雲路

畫梅歌為朱大理題

天地有清氣鍾人亦鍾物阿誰寫出江南春彷彿湖山
見佳木老幹何槎牙柔條亦森羅踈枝夭矯相交加花
神幻出連空葩長風吹落天家雪萬蕊千枝曉爭白瑤
臺仙子舞衣飄姑射神人珮珠結冰玉之姿孰與倫生
來不受半點塵野草閨花真瑣屑簾桃俗李徒紛紜物
意有如此人間真太奇庾嶺何須訪消息孤山不用尋
橫枝但願江山處處結真味共與鹽齏調六氣星騎箕

尾若可追編書垂譽過千世

山水圖歌為蒲守徐孚題

誰寫雲山與烟水爽氣清風盈幅起想當鮮衣盤礴時
坐驅造化入筆底須臾削出金芙蓉奔湍駭浪爭朝宗
元氣直穿古石裂懸流疑與銀河通青林遠近不知數
林內山房啓晴戶時清似有招隱歌地偏不見採芝處
我昔持節天下遊東窮海岱西梁州忽見斯圖憶所歷
江山清思何悠悠河東之守好奇者特送圖來索題寫

自知老大筆力微掛一漏萬語非假強裁長句卷還時
坐中尚覺留清颺仁知高懷在山水賢守玩此應得之

送鄭侍郎歸省

吾聞侍郎之父御史祖閱世如今八十五飄蕭鶴髮未
龍鍾巉巖俊骨自奇古侍郎蚤歲簪筆趨螭頭五朝出
入遷擢寵渥稠往年龍勅推恩出天府前年鸞誥封秩
來廬州老親榮貴重重真罕比銀章金帶照耀鄉閭裏
侍郎官署居南京思親只隔長江水今春乃上陳情歸

省章報可丹誥飛下五雲鄉試問此時拜恩感恩意東
流之水與之誰短長便理南歸舊囊橐沙頭潮退畫舫
閣京華相送盡公卿冠蓋追隨出郊郭是時正值春光
明媚春氣和柳條弄色流鶯歌江草萋迷含烟競駐紫
騮馬江花凌亂隨風飛拂金叵羅酒盡潮來掛征席想
到家鄉祇幾日升堂拜舞多弟兄堂前羅列兒與孫歌
曲庭闈沸絲竹賓朋門巷如雲屯大啓華筵斟壽酒懽
聲喜氣傾前後齊言靈椿不老南山高共願親齡與之

同悠久

送安城戴勿諒歸江西

戴生大司成之姪，婿經授春秋，究凡例。春王正月，大統明西狩，獲麟，筆削既二百四十二年，指掌中屬辭比事，須融通謹嚴，獨得昌黎老大義，特造伊川翁經世之書。真大典，魚魯何如？尚訛舛胸中，要自有權衡。筆下何須苦裁剪，戴生業此凡幾年？一朝歸興何翩然，連環屢夢老親面。蘭橈便理西江船，江頭載酒紛紛來送別。半是

青雲之器橋門客離情草草何足云英論滔滔殊未竭
明維九月天宇涼洞庭木落南鴈翔丹楓耀日染霜紫
白雲暎水搖秋光祖筵酒盡掛征席千里鄉闐祗幾日
升堂拜舞稱壽觴倍覺雙親喜盈溢雙親之喜將何如
有子一別三年餘但得經書載子腹絕勝甘旨左右趨
戴生起拜奉親志讀書須學聖賢事古來聲利等浮雲
直自麟經邇洙泗

春江送別為陳侍御兄賦

有客有客官內臺難兄千里挈舟來典衣沽酒共歡笑
狂歌放飲懷抱開燈前幾時同聚首又復忽忽各分手
借問歸期何太忙荅云慈母相思久交遊出祖春江邊
春江楊柳含青烟維舟蕩漾碧波裏傾觴潑灑飛花前
玉瓶酒盡征帆發咫尺風濤分楚越沙上鵲鴿相背飛
雲間鴻鴈分行別莫云去住難為言誰似君家賢弟昆
難弟致身位方遠難兄歸養名何尊想到淮南春未老
慈親手弄連環好稱觴正值佳節和戲綵偏宜晴日皎

切切丁丁母子情為言官況清如冰會有鸞章下霄漢
褒封永作家門榮

送虞憲使考滿之京

山東憲使何昂藏鐵心古貌眉髮蒼出入四朝荷天寵
操持一節飛秋霜海岱茫茫幾千里十年監部平如水
只今報政趨神京僚庶追攀情不已薰風楊柳城西亭
綺筵別酒傾銀瓶一舉十觴勸公飲氣酣感我千古情
千古之情向公道要使蒼生樂熙皞內臺黃閣正需賢

此去嚴程到須早

醉吟樓歌為劉僉憲父賦

醉吟之樓高且雄誰其作之醉吟翁翁心豁落真宰同
作樓直欲凌蒼空危梯縹緲疊撐拄層軒洞達相開通
白雲片片宿梁棟青山隱隱當簾櫳長夏絕超爽靈風
洒清響秋蟾散影九萬里曉雪懸光一千丈四時風景
佳翁來日登賞賞心苦未足呼酒滌塵想一觴一咏自
風流興酣萬物良悠悠傲睨五岳衆山小吞吐七澤三

江秋有時醉倚闌干望八極便欲排風御氣仍丹丘却
思李杜文章伯只今已作神遊客舉杯且復一招之招
之共飲樓頭月月光入口清心魂唾珠洒作澄江雪澄
江雪何茫茫瑤翻玉湧蛟龍翔是時翁與二子相頡頏
搜括百怪神鬼藏陶鎔萬象造化忙乃知醉吟樓不讓
采石江邊亭浣花溪上莊

遇知行簡陳廣文

豈不聞北海鵬扶搖一夕起搏擊九萬程又不見渥洼

駒朝飲東海水暮宿崑崙墟古來磊落奇男子變化騰
驤亦如此英風激烈干雲霄偉績軒轟冠青史我昔年
少天下遊大河南北西梁州望遠將登岱岳頂觀瀾欲
泛溟渤流爾來戰藝梁園日秋月離離桂花實更隨春
水到龍門一躍風濤生霹靂中間歛翼就閒居戎冠且
復歌唐虞半載悠悠客京索千錢僦得城南廬城南之
廬絕蕭洒開門直見南山下南山朝青暮亦青人情誰
似山光者陳夫子儒之豪早年獨步亨衢高雄文應不

讓班馬清詞真可追風騷籍籍才名三十載到處菁莪
秀而藹春生杖屨樂薰陶霜吼金鐘共傾駭衆人視我
同衆人先生視我情何真乃悟知音古來少伯牙獨與
鍾期親先生賸注樽中綠我為先生歌一曲老天生才
既有需豈向塵埃長碌碌一歌既竟還復歌歌長此意
將如何殘冬便須終日醕酹醉春來喜見萬里風雲多

題王司訓汶陽親舍圖

先生累葉居鄒魯禮樂詩書紹先祖夫子遺風飽已聞

杏壇遺跡頻經覩一自賓興上玉京
便拜除書綰絲組官在中州千里餘
回首鄉關路修阻為因甘旨缺晨昏
故遣良工寫鄉土淡靄初分嶺上村
輕烟乍點天邊樹洙泗微茫洄不流
龜蒙岌業黯將雨憑軒忽若無丹青
汶水之陽見庭宇花間一鳥窺簾櫳
竹裏兒童隨杖履靜聽如聞琴瑟鳴
細看似覺斑斕舞先生乃是純孝人
思親對此融心神錦衣有日遂榮養
壽觴更祝如大椿吾聞昔日唐忠臣
大行跋馬高嶙峋白雲孤飛繞親舍

望之不覺涕零巾至今香名滿人耳先生豈不追芳塵
願將此圖莫輕擲子孫永作傳家珍

留別王大尹

憶昔年少登公堂公堂開宴羅笙簧紅燭傳觴鸚鵡煖
錦箋落筆蛟龍翔賢侯愛客情無已留連夜宿重簾裏
香消古鼎語未闌月滿雕梁眠未起中間契闊十年餘
千里關山恨索居何意今朝復相見烹羊醺酒為懽娛
愧我馬蹄隨計吏朔風又捲河梁袂握手難忘父母邦

銘心佩感賢侯義賢侯之義孰與儔冰壺玉鑑涵清秋
報政行將覲明主春花相約鳳池頭

題醉仙圖

畫圖忽見瑤池仙排風馭氣今幾年弱水蓬壺恣往還
滄海見說成桑田流霞之酒如長川偶來醉倒東風前
長松落落芝芊綿羣仙倚側坐與眠壺既為之傾瓢亦
為之顛沈冥不管山花妍拂袖涼颼神凜然共騎黃鶴
凌蒼天

贈同年

吾聞洞庭之水幾千里巨浸茫茫接南紀蛟龍夜舞風
濤寒鷗鳥晴浮鏡光紫岳陽之樓高且雄元冥北牖南
祝融媧皇悞落補天石君山一點玻璃中吐此湖山兩
奇絕孕秀儲精此其穴應有賢俊生乎間豈獨崧高產
英傑我昔年少天下遊只今三十來神州同時射策摠
豪邁翩如彩鳳翔高丘有客昂藏好眉宇家住巴陵幾
今古已應秀氣鍾湖山更覺詞華紹先祖偶騎鯨背遊

赤霄赤霄仙子爭相招想當沈醉碧桃下一花吹落春
江潮自爾棲神元圃側煉氣餐霞學胎息一朝九轉就
還丹羽化千人萬人識清水芙蓉吐異葩蘭茗翡翠相
交加珊瑚色明海底樹雲錦光吐空中花紫府之名照
丹籙鈞天細聽簫韶曲欣逢明聖登俊良喜遇昇平調
玉燭馬蹄共踏金臺春與君義氣殊相親志節功名須
努力賡歌願作虞廷臣

金臺春意圖為夏進士賦

西山千仞插天碧東海排空浪頭白山雄海壯擁神京
中有金臺臨紫陌臺高迢遞絕塵埃九天星斗羅三台
臺前一夜東風起吹得皇都花柳開花枝杲杲明朝旭
柳色依依裊輕綠九衢車馬睹晴輝萬井笙歌連曙燭
有客磊落豐城人寶劒出匣光芒新兩度青雲不得意
今年一舉超常倫金臺駘蕩春光好對策彤庭漏聲曉
寶殿臚傳瑞氣多天門榜放祥雲繞錫宴南宮春晝遲
錦袍不管杯淋漓醉向和風滿歸路紫駟蹀躞爭驕嘶

綺樓翠牖出雲幕粉黛朱顏擁芍藥傾城人看綠衣郎
意氣昂昂動寥廓幸逢明聖坐垂旒聯翩彩鳳鳴高丘
成名祇向鴈塔寫放歌不作平康遊金臺春色看未已
又沐天恩還故里盡將此意入丹青期與乾坤傳不毀

送劉侍御

青驄曉嘶春日明銀鞍穩被珂玉鳴笏冠繡服何光榮
乃是烏臺柱史朝神京故鄉之山鬱崢嶸綠溪白石蒲
芽生交朋相送難為情大槌鼉鼓吹匏笙四筵列坐皆

豪英高談直使鬼膽驚醉來不覺金壘傾起舞意氣殊
縱橫我歌一曲送君行丈夫立志當軒轟古來多少影
華纓惟有忠義留芳名豈無鐵面寒亦有攬轡清願君
追取二子炯炯之精誠仰酬盛世開隆平

苦雨

涼風颯颯雨聲急出門跬步苦沾濕山城拂地雲霧深
河渚交流潢潦溢田夫野婦坐歎息園中有棗不可食
况復離離禾黍垂及時不得收穫力一年百事望秋成

秋成奈此淫雨積誰哉為我誅雲師宛見青天行白日
男亦欣欣女亦懽有衣有食安家室

郊遊

客居煩聒毒我腸偶騎欵段登周行西行三里渡小水
北上百步臨高岡遠近人家翳喬木依稀郵舍圍垂楊
是時隴麥半乾槁南風起浪日色黃所遇林桑已空兀
誰家婦女猶提筐惟南有山接嵩少雲門開闔峯低昂
清回爽氣徹心目便覺塵慮都消忘回鞭窈窕歷溪谷

野花野草供幽香
殼蝸垤蟻各生遂
潛鱗飛鳥咸徜徉
東折縈紆歷平坂
縱觀大化窮毫芒
乃悟羣生隱無極
始知一氣包鴻荒
此意悠悠真罕識
令人酷憶點也狂
緩轡歸來日已夕
滿懷風月天茫茫

故鎮行

北山翠嶺界天碧
山前古境烟霞集
兩街老木風颭颭
幾道寒泉聲瀝瀝
溝塍繚繞禾麥稠
椒林果實被道周
人家門巷甚蕭洒
村園水石殊清幽
西邊梵宇臨深谷

俯視溪田藹新綠鐘閣風雲入壯懷佛殿金銀炫塵目
斷碑蒼蘚還摩挲細看歲月良已多趙宋金元迭興構
黃童白叟爭奔波誇雄競麗猶未已衰歇幾何還又起
大道由來甚坦夷何不歸斯而舍彼親朋導我村北行
叢祠戶牖塗丹青龍堂鬼物極雄怪土祠洞府何幽冥
還復崎嶇歷西澗褰衣競涉波凌亂高柳啾啾栖暮禽
平蕪渺渺語飛燕嗟哉此境良亦稀遊覽未畢情依依
念我昔年走天下每逢山水娛清輝况茲故里好林壑

有田可耕薪可斫待余他日重歸來擬卜山居尋舊約
西磴行

偶來與客遊山前地幽便覺人境偏路入青林幾縈曲
濃陰不斷風泠然漨漨清泉來遠谷紺色寒聲瑩心目
石梁急瀉跳明珠草岸平流浸青綠北行更欲尋泉源
山門蓄霧勢吐吞兩峯秀出半空裏錦屏屹立當中尊
復憇山闕小琳館洞戶雲扃殊宛轉袖拂塵埃讀古碑
茶餘苦乏闕精飯歸來白日天未中回頭尚愛千雲峯

更待秋初稍涼冷還登絕頂窺鴻濛

峽石山行

古道黃泥沒車轂峻坂迢迢客行苦別尋細路出山椒
俯瞰羣峰如累土山椒怪石何巉巖小大累累兒逐母
忽驚耳畔過狂飈老木如人自掀舞陰陰空谷啼飢猿
慘慘深林嘯猛虎時時一顧破羈顏秋葉秋花鮮媚嫵
霜林色重紅欲然露菊香寒寂無語日暮峻陵風雨來
千山萬谷堆雲霾回視人寰不知處恍疑馭氣遊蓬萊

新安行贈王廣文

西通嶠沔東洛陽澗流曲折波浪浪連峰疊巘互低昂
溪橋野店遙相望函關開豁地一方新安老樹浮高隍
山迴川合鬱蒼蒼儲精孕秀不可當錢君若水慎行藏
急流勇退何徜徉韓侯擒虎智力強高勲亦可銘太常
其餘豪傑皆昂藏弱毫未易俱談揚王喬古洞南山陽
世傳鐵斧殊荒唐洪鑪烈焰徒煌煌百煉不改纖毫鋼
古來雷斧墜穹皇陰陽搏結成鋒銑鐵斧無乃類此行

胡為末俗相驚惶
我行愛此山水鄉
往來屢宿芹蘋堂
芹蘋廣文情慨慷
時能取樂行華觴
諸生羅列芝蘭香
爭持斗酒澆我腸
醉來意氣何揚揚
為之放筆掃粃糠
掇拾故迹百十忘
頗勝燕石為琳琅
欲行不行意徊徨
明朝別思俱茫茫

寄溫縣江司訓

君住江南我江北
關河千里萬里隔
一朝振翮起翱翔
同逐春風遊紫陌
是時英俊天下來
南宮角藝何壯哉

豈意主司濫收采繆將寸木升崇臺君持木鐸向溫邑
曾問士風鮮愁寂我亦拜恩歸讀書却抵滎陽問家室
滎陽溫邑隔大河相尋一葦曾經過嚴親今歲官河內
往來擾擾如奔波愛君特達好心事一回相見一歡恣
夏館清談移晷陰秋齋共宿發幽思有時酌我金屈卮
我還答以二鳥詩醉來意氣覺奔放生平肝膽何崛奇
近日分携隔風雨羈懷落落向誰語行將跨馬過君家
寄聲為釀新秋黍

送蕭都憲歸盤窩歌 並序


盤窩者都憲蕭君所營別墅之地名也蕭君江西龍泉人其所居里曰南園去南園十餘里有山水林木峭列迴環蒼鬱其間人以其地僻遠而莫之顧蕭君自登進士為僉憲時以省祭歸鄉里因遊其地登高而望入溪而步俯仰四顧知其勝絕可為退休之所乃命童僕芟其草萊而佳樹列疏其壅滯而泉流清則山若增而高地若闢而廣水若

積而深而凡雲光霞彩嘉花美木千狀萬態獻秀
爭奇於前觀玩之久意若忘歸蕭君以古有盤谷
以斯地較之未知其為孰勝因名之曰盤窩乃結
茅以避風雨遂記其事而目為十景詩以詠之今
年冬蕭君以病得賜告之恩將南歸尋所謂盤窩
者朝之大夫咸為詩歌以贈之余亦賦蕭都憲歸
盤窩歌以送其行云

古揚州之域今大江之西名山名水相望其間罕與之

齊龍泉乃在山水最佳處盤窩直與盤谷爭勝足以成
幽棲吾友蕭君生其邑鍾秀精英抱高識神駿早掣飛
電蹤大鵬快展扶搖翼天上迢迢十二樓鳴佩早與羣
仙遊東俯扶桑枝西瞰崑崙丘珊瑚文彩滄瀛流吳鉤
光射瀚海頭聲譽喧喧鬢未改賜歸倍覺天恩大蕭蕭
行李出都城漠漠雲帆掛淮海長江西上知幾程家山
次第來相迎盤窩林嶺秀盤窩水石清東潭西障迭隱
見馬山龍洞相紆縈離口橫波秋色冷朝帽之峯露高

頂平林歸翼晚來稀遠浦漁舟歌韻迥雲陂春牧散無
邊高野秋禾成萬井盤窩之景何其多蕭君柰此盤窩
何或時採其山或來釣其波松根茯苓自可斲而煮松
花崖蜜亦可調而和山間茅屋極蕭洒嵐靄氤氳清水
瀉靜時翫易窺見天地心閒日彈琴並與親朋話盤窩
之樂難具陳應知道卷堪怡神但恐勿樂有喜鶴書飛
來自天上東山謝老未許獨樂忘生民



敬軒文集卷三

欽定四庫全書

集部

敬軒文集卷四

詳校官編修臣翟槐

中書_臣劉源溥覆勘

總校官庶吉士臣何思鈞

校對官中書_臣李斯咏

謄錄監生_臣朱坦

欽定四庫全書

敬軒文集卷四

明薛瑄撰

絕句

銅雀臺

銅雀臺高春日明
春風無限綺羅情
笙歌莫向西陵奏
松柏蕭蕭起暮聲

春日即事

一夜東風柳穗柔
曉來紅日在簾鉤
少年兩兩鳴鞭過
唯見香塵撲馬頭

舟中雜興柬韓克和劉自牧王尚文宋廣文十
八首

公等文章班馬儔
偶來聯步上瀛洲
天恩又許歸鄉里
同泛南風五月舟

天上同霑雨露多
扁舟又喜泛滄波
冥冥鳥背夕陽暮
千里月明聞棹歌

霄漢銀河接潞河諸公同此沐恩波於今又遂歸寧願
漸近家山喜氣多

萬家城郭通州市十里帆檣潞水船清曉登艫望京國
鳳凰樓閣五雲邊

波光到底見星辰中夜行舟月色新睡覺水村鷄已唱
雲帆清曉過天津

細草微茫間渚沙烟林杳靄暗漁家舟行不辨東西處
但倚危檣看月華

舟行暑氣正溽，忍岸上行人方鬱。蒸安得長風來萬里，
頓令煩濁片時醒。

天高雲影層層出，野曠河流曲曲長。百丈牽風晴裊裊，
櫓聲搖月夜茫茫。

兩堤草色綠無際，五月草蟲聲已清。自是天機能動物，
舟中聞此倍多情。

堤上閒遊眼界寬，青天不盡地漫漫。此心便覺無拘礙，
誰信人間行路難。

天開水面平鋪月風湧潮頭倒捲沙舟過前村迷遠近
一堤楊柳數聲鴉

夾堤楊柳綠依依傍水人家籬落稀小婦携籃賣蒲笋
得錢含笑入荆扉

水畔人家舟作屋飄飄身世長兒孫幾回睡足蘆花月
又引帆檣過別村

參透詩禪漸息機掀髯覓句句還遲橹聲驚覺船窓夢
遙見青天一鳥飛

纔罷沿流又溯流關河不盡興悠悠書生別有胸中畧
閒看橫江萬斛舟

千年宇宙混輿圖萬里江河接舳艫澤國晚來飛鳥盡
海風吹月上天衢

蘆葉青青潮水平吳儂搖櫓唱歌聲歌聲櫓韻隨潮去
背立江風無限情

江北江南一水通往來舟楫自怱怱推篷獨坐渾無語
遙見青天日正中

酬陳廣文送菜

秋圃應知雨露多
嘉蔬分送奈情何
書生咬得其根味
絕勝金盤薦紫駝

早度古嶢關

四圍山勢鬱崔嵬
清曉關門傍水開
一騎秋風揚策度
野花隨路送香來

由蓼子谷取捷路抵鞏黃河北徙有感

此路經過已十年
重來河水變桑田
西風不盡登臨意

又見寒鴉下夕烟

鞏洛道中

嵩高雲氣晚嵯峨
清洛西風咽急波
水色山光渾似舊
宋家陵墓夕陽多

王弼墓

四聖千年道久湮
誰從羲畫見天真
先生埋骨邙山後
猶有玄虛誤世人

宿白馬寺人家

白馬駝經事已空
斷碑殘剝見遺蹤
蕭蕭茅屋秋風裏
一夜雨聲鄉思濃

函谷關

嬴秦烈焰掩全齊
誰遣君侯更向西
關上月明關下路
英雄千古怨晨鷄

登平陸城樓四首

獨倚危樓日向西
洪河風起浪高低
中條北去無多路
回首鄉關路不迷

斷岸奔流萬里風
踈林黃葉九秋中
畫闌干外斜陽暮
併作離愁一段濃

客愁偏向九秋多
况復登樓望濁河
相去弘農纔咫尺
苦無一葦暫從過

中條秋色滿山城
一上危樓感慨生
天外黃流來滾滾
扁舟端擬駕長鯨

興讓里

岐陽日色正輝輝
纔被餘光便息機
却把爭田為棄土

頓令江漢總思歸

山水小景四首

湖水茫茫浪拍天
春風湖上有人烟
小樓半在花林內
簾捲青山看釣船

石上長松落午陰
有人松下鼓瑤琴
南風過處渾無迹
祇見千山萬水深

老樹蒼崖滿目秋
水明沙淨晚烟收
如何萬里長江內
只見斯人泛一舟

兩崖雪罷樹無風
泛泛扁舟水月空
疑是山陰尋戴老
此時清興正無窮

七夕三首

絕憐天上有佳期
汾水西風獨夜時
望斷銀河仙路遠
鵲橋不見度星旗

身世浮雲無定迹
客中二十四回秋
故鄉此夕逢佳節
閒看星河徹夜流

三處三年逢七夕
鄢陵京索晉河汾
人生是處堪行樂

領取清風對酒樽

留別諸友八首

留連冉冉已過夏
離別忽忽又值秋
酒盡玉壺歌舞散
月明千里照汾流

多情累月重留連
惆悵西風送別筵
咫尺江山暫分手
及歸應在早花前

綠樹秋風起夕涼
離筵歌舞斷人腸
欲知別後相思切
明月關山滿路霜

樓頭鐘盡曉風清南陌殷勤送我行十里汾流兩岸月
祇應總是別離情

汾水西風生夕波離筵忍聽唱驪歌男兒不洒相思淚
翠袖紅裙奈若何

離鸞別鶴不須愁暫向中州訪舊遊待我明年二三月
看花同上禹門樓

扁舟清曉渡汾河露草風蘆兩岸多却望高城雲霧盡
好山一帶列青蛾

錦瑟銀箏酒半酣
離情幾許舊曾諳
却憐後夜相思處
三晉山高月正南

秋日過洛陽

洛陽城西今又來
颯颯秋風吹客懷
禾黍荆榛蛩韻切
昔人曾此起樓臺

中秋對月遣興

涼露滿天秋氣清
月光先到客邊明
舉杯對影深相屬
只有姮娥不世情

元夕寄故鄉諸友八首

故鄉千里隔關河
好景年年客裏過
又見元宵春一度
紅燈幾點月明多

鄉人新自故鄉來
千里魚書手自開
聞道家山風景好
玉笙吹月共徘徊

寂寂閑門掩月華
春街兒女任諠譁
窻前坐久銀燈燼
首首詩成只憶家

莫道他鄉勝故鄉
思歸一日九迴腸
元宵忽共鄉人語

為寫新詩寄上庠

思鄉無日不關情
況復春燈對月明
欲作家書附回使
歸心先過洛陽城

舊說歸期已失期
更逢佳節倍相思
交親若問今何似
客裏春來困酒卮

中州何事重留連
憶別諸公已半年
遲我河汾看春色
百花深處酒如泉

回首鄉關入夢頻
馬蹄踏盡幾年春
客中膽氣崢嶸甚

肯把明珠漫贈人

題母處士畫梅竹二首

疑是孤山處士家
暗香浮動月初斜
千紅萬紫雖無數
獨領春魁是此花

湘江兩岸鷓鴣啼
翠袖天寒日又西
可是無人伴幽獨
紛紛桃李下成蹊

行黃河岸上

蒼崖千仞俯黃流
滾滾波聲大地浮
惆悵靈槎無復見

壯懷祇擬付神遊

看楊花戲作

紛紛拂雪花香旋逐回風過粉墻坐困綠陰看未足
無端春思正悠揚

題蒲守劉公梅竹二首

誰傾金醴醉仙娥綽約朱顏總已酡莫向風前吹玉笛
恐驚春夢入江波

此君老矣勢猶豪新長孫枝節漸高好似一門賢父子

清風相倚迥難招

韋廣文送醯

鼎鼐何堪欠此生銀瓶携送滿寒清從今肝膈添詩思
肯使酸齋擅大名

過賈魯宅

長平驛是相君家不見當時富貴花只有蒼蒼喬木在
至今猶宿夕陽鴉

長平

行過長平慘舊名
路人猶指昔年坑
不知當日將軍死
地下曾無見趙兵

滎陽道中九首

老親官定覃懷後
遊子南來京索時
舟渡濁河高處望
太行秋碧繞天涯

前途十里即溫城
暫向村林避鬱蒸
野老多情能款客
呼兒旋撇甕頭清

一年幾度過黃河
霽景清風此日多
臨流滾滾興無盡

直欲遙吞萬里波

河水南邊廣武山山頭簇簇故城閑徘徊不盡千年事
秋草秋花駐馬看

獨尋危坂出高岡蔓草荆榛古道荒谷口人家似仙館
幾間茅屋蔭垂楊

一上河濱眼界寬秋風禾黍動秋山教倉甬道不知處
唯見孤雲自往還

連村綠樹亂蟬秋禾黍離離正滿疇為愛中州好風景

揮鞭不厭往來遊

天高地闊鳥雲飛天際涼飈動客衣萬物生成看未足
滿懷清思正微微

馬上看書意若何悠悠隨處任經過舉頭忽見南山近
爽氣清輝倍覺多

次劉僉憲見寄韻四首

憶對清陰轉午遲杯行到手欲無辭高山流水今何處
鴻鴈南來有寄詩

開緘忽見右軍書麗句清詞愜所需何限相思動秋意
蟬聲況是晚涼初

幾年持節道途間驄馬遥遥意氣閒況有青山隨處好
料來詩思未應闌

憲府新成小屋居居中惟貯舊琴書希聲古道應何似
一榻清風樂自如

通鑑

千二年來治亂機只從理欲辨安危若將此鑑為心鑑

三五如何不並歸

禹門

連山忽斷禹門開中有黃流萬里來更欲登臨窮勝觀
却愁咫尺會風雷

渡口

兩崖陡起束狂瀾南去沙平勢渺漫長有扁舟依渡口
行人莫道往來難

棧道

石巖危柱迭相承閣道縈迴接杳冥天上黃流來滾滾
長風五月灑衣清

明德宮

碧瓦朱楹白晝閒金衣寶扇曉風寒摩雲觀閣高如許
長對河流出斷山

宮前老栢

蒼蒼老幹鑄青銅縷縷香毛引細風自是栽培年歲久
托根長近禹王宮

看鶴樓二首

石磴盤雲到上頭
高風五月已驚秋
眼空四海無纖物
惟見黃河天際流

一柱巍峩勢獨尊
鐵崖三面下無根
偶登絕頂思前事
滿目河山孰與論

水閣二首

水閣憑空結構牢
蒼崖直下俯洪濤
輓轡牽綆應千尺
還似垂綸釣巨鰲

飛樓縹緲架黃流
滾滾波聲世界浮
遍倚闌干憶前事
功成四載幾經秋

后土祠

一木為橋渡斷溪
山風水氣冷淒淒
千年古廟蒼崖下
萬里河流正在西

石龕

古屋縱橫半畝餘
只疑神鬼護陰虛
蒼崖直上通元氣
點點寒泉滴露珠

靖應姜真人菴

靖應真人隱者流聲名往日動宸旒功成不在飛升去
禹廟連雲檜栢秋

題四景四首

雲滿青山水滿溪綠楊紅杏繞幽栖抱琴童子隨師去
歸到橋心日未西

水心亭子四山青亭下荷花照眼明我欲喚船楊柳岸
隔溪終日不聞聲

四山木落晚江空江上茅齋爽氣中立盡秋風何處客
磯頭日日看飛鴻

怪來寒氣襲襟裾忽向高堂見畫圖樹老山空江似練
扁舟不受旅人呼

題季札掛劍圖

心許君侯口未言歸從陵樹掛龍泉生平負諾知何限
始信當時公子賢

題負薪圖

自古詩人詠伐檀山中不道負薪難到家遠近何須問
行過溪橋路已寬

四皓圖

雪鬢蒼髯識者稀功成猶自昧先幾寧知後日紛紛處
却道劉侯計已非

睡熟

睡熟不知風大作到曉猶聞波浪聲起坐覓紙欲題句
却憶遠人無限情

紀先人舊遊三首

壇樹濃陰覆四牆
春深好鳥囀笙簧
慈親此日不同聽
樂意翻成淚兩行

西壑南岡景物幽
先人曾此數追游
重來不似當時興
綠草紅芳總是愁

先人最愛佳山水
每對清流翫翠微
俯仰忽成今與昨
看山看水淚沾衣

檢舊書得先人手迹

素帙窻前自卷舒
忽看先父數行書
分明筆迹如平日
一字傷心一淚珠

題錢舜舉山水小景

琪樹秋風生早寒
樓臺縹緲暮雲間
橋頭有客長無事
閒聽溪聲靜看山

觀太極圖二首

歛襟坐久此心虛
靜看濂溪太極圖
理在象中元不雜
莫於象外用工夫

一理陰陽及五行乾坤萬物各生成莫言真宰元無迹
久向圖中露此情

春興三首

客居城市厭喧囂舉目雲林變綠條好景一年都已過
何曾散步到西郊

懷抱何由一灑然勞生擾擾故相牽城南山色青如許
不到雲林又幾年

又是春風換物華靜觀芳意浩無涯寄語鶯花休悵望

新詩已懶向人誇

新鄭學宮夜宿

清颺槭槭響林柯
夜宿秋堂冷簟波
睡醒不禁鄉思切
滿庭明月候蟲多

劉廣文携酒餞行

先人館下老門生
三十年來故舊情
今日相逢頭已白
殷勤載酒問歸程

過盧溝河有作

烏府新承帝澤覃又持憲節按湖南盧溝橋上瞻都邑
金闕連雲倚翠嵐

出漢口五首

扁舟泛泛野湖平岸轉奔流近漢城滿目江山如畫裏
留題多少舊才名

萬里長江滾滾來楚山凝碧樹如苔扁舟橫渡浪花急
一蓆好風何快哉

漢江南合楚江流新漲兼天雪浪浮黃鶴不來仙已去

舟人猶指舊時樓

萬里滄江水自東武昌烟樹晚朦朧
獨持憲節忽忽過興憶南樓夜月中

人家樓閣枕江烟江上危檣泊萬船
欲問當年無故老青山依舊水連天

出漢口至大江追憶往事有感而作

武昌城對漢陽城城下長江漫漫平
二十年前曾過此烟波一望不勝情

覽嘉魚圖經

閒覽嘉魚縣地圖半為山谷半為湖生民計業知應薄
祇賴昇平雨露餘

公安詠古

古砌長衢滿綠苔踈籬多傍水邊栽欲知何處懷平仲
老竹荒祠風雨來

蜀江水漲如黃河江北諸山彷彿太行遣興而
作

蜀江濁比大河黃江北諸山似太行誤喜中原應不遠
却聞人語是湖襄

澧州

秋日秋風澧有蘭碧峰如畫水如環荆南自古多騷思
長在閒花野草間

常德

百里平川古朗州沅江滾滾向東流竹枝留得唐人句
一曲西風碧樹秋

武陵

萬水千山舊武陵
伏波曾此向南征
只今無復壺頭險
擊鼓謳歌樂太平

次同年趙侍御阻雨韻五首

秋夜蕭蕭雨未休
碧窓欹枕憶神州
霜風會見清南徼
未必輶車久滯留

天使乘驄此暫休
今朝我亦到南州
栢臺孤枕銀燈夜
還似當年阻雨留

瑤樹西風透客懷
早秋涼雨壓塵埃
行臺壁上留佳句
知是同年攬轡來

壁上留題見好懷
旋將征袖拂塵埃
浪遊不得逢知己
阻雨今朝獨後來

境入桃源喜滿懷
分司衙裏絕塵埃
繡衣壁上題詩日
正是隨車好雨來

桃源曉行

隔江烟樹曉模糊
縱有丹青畫不如
且喜桃源風景好

山行不厭路崎嶇

宿界亭驛

山月娟娟滿戶庭
秋蟲唧唧四邊鳴
一杯強飲不成樂
坐聽山童打二更

辰溪次趙子裕韻二首

盡日山行不厭遲
肩輿隨處愛秋溪
路回忽見江頭縣
風景清幽興不迷

辰陽已覺鴈書遲
滿目雲山接五溪
秋夜一杯江縣酒

醒來鄉思不曾迷

益陽山行遇雨

雲林漠漠雨淒淒
節節危橋曲曲溪
可是青驄行處穩
滿山紅葉襯秋泥

雪中度風門嶺

肩輿千仞歷崢嶸
朔雪寒雲杳靄中
遠近東西渾不辨
只疑猶未闢鴻濛

靖州道中溪水清駛可愛

石淙急瀉響奔雷
濺沫跳珠雪湧堆
正苦荒山勞降陟
且隨流水共縈迴

池邊笋生

綠錦池塘春已深
池邊青笋欲成林
貪看物理添新趣
不管滔滔歲月浸

遣興

永日霜臺與衆疎
相親惟有聖賢書
綠雲滿院蒼苔合
自喜能兼吏隱居

黔陽春日雜詠六首

滿庭落葉似深秋
好鳥鳴時地轉幽
坐對青山纔咫尺
會登絕頂望中州

風起楊花滿院飛
翠屏門外送清輝
蠻中好景非吾土
春燕來時客未歸

兩年三度客黔濱
前是秋冬後是春
新綠滿庭清晝永
好風時復送香塵

弱柳新梅蔭戶庭
好山門外列青屏
間關幽鳥鳴春晝

宛似家山把酒聽

睡起霜臺似水清
晚春風日弄新晴
笑看蟬子頻頻集
却憶人家望客情

駐節黔中改歲華
四山重疊繞天涯
空庭獨坐聽鳴鳥
拂面春風吹柳花

黔陽山中十首

景好寧知是異邦
竹籬茅舍枕滄江
吏情更有山林趣
綠樹門前畫戟雙

星輶玉節萬山深到處溪流足茂林雨過瘴烟清似洗
蠻荒不減壯遊心

盡日江行路不迷溝塍水滿稻秧齊參天綠樹茅茨小
何處人家叫午鷄

山青雲白楚天涯駐節山中白晝遲縱是無邊清興好
知音誰與和新詩

江村地僻草萋萋小閣閒登日欲西風景不殊雲木秀
只嫌中有鷓鴣啼

清和時節似中州
江遶茅堂盡日幽
官況不羈情散誕
坐看雲影自悠悠

宦情不改讀書情
閒愛山林興致清
隨意時時寫佳句
却嫌行處有虛名

竹椽茅屋江邊靜
永日惟應鳥雀飛
雲白天青山萬疊
霜臺遠客正思歸

花木時光總不窮
青山疊疊水重重
欲尋真宰元無迹
祇見蒼蒼一氣功

草閣南風分外涼
看山面水據胡床
宦情蕭散知何益
身在江湖憶帝鄉

四月望夜院中作

月照芭蕉葉上明
小闌干外竹林清
一襟風露涼如洗
似有新秋在戶庭

對雨遣興簡陳侍御七首

秋雨通宵盡日鳴
栢臺雙沼漲皆平
綠荷裊裊歛香柄
細看明珠瀉未停

曲闌干外芰荷香
秋雨來時水滿塘
喜與同年驄馬客
水心亭上共持觴

南荒久與故人疎
邂逅同年一月居
共指小塘荷葉底
水添秋雨欲生魚

同年持斧到南荒
笑指關山滿路霜
一月沅州城裏住
聽風聽雨喜連床

君恰來時我欲歸
沅江秋雨正霏霏
鵷班若問新消息
為說清霜滿繡衣

綠萍如錦蓋青池池面高荷靜不移閒愛小亭聽雨坐
恰如湘水繫舟時

同年喜有繡衣人沅水相逢意氣親我去君留莫惆悵
邊氓快覩曉霜新

襄陽雪中雜詠六首

扁舟南渡漢江來阻雪連朝住憲臺莫道鐵冠官況冷
瓊瑤庭下已成堆

烏臺南面郡城高城外諸山雪亂飄勝蹟欲追羊叔子

會從峴首踏瓊瑤

空階密雪下無聲
葉落層層蓋已平
盡日戟門清似水
端居誰與論詩情

堂臺高敞四虛寒
窗外蕭蕭竹萬竿
一夜霜風鳴到曉
散為清響滿人間

襄陽城外雪紛如
散入江流片片虛
乍有却無迷望眼
只疑神女弄明珠

少年曾讀浩然詩
襄漢風流百世師
今日雪中清興好

論文翻恨不同時

芭蕉

夫君本自一心空舒卷如何葉未窮自是根株通大化
故教有象顯無蹤

靖州月夜雜詠五首

一節三年久在邊天威咫尺玉堦前靖州城裏清宵月
應與家山一樣圓

參差林影受風斜
堅坐胡床愛月華
涼露在庭清似水

不知今夕是天涯

城外清江城上樓滿城明月似深秋忽思昌子雖癡小
也念阿爺尚遠遊

未有涓埃荅九天漫叨官廩過年年靜思仕學多違性
搔首能無愧往賢

三百年來新郡邑七千里外古蠻荒無私好是中天月
布滿清輝一樣光

夏夜聞鐘

翠帷簾簾竹方床孤枕慵便五夜涼夢裏不知身作客
忽疑鐘響是家鄉

盧溪冬夜五首

幾度官船過武溪匆匆都未有留題今來駐節當寒夜
絳燭紅爐興不迷

曲曲清江節節山霜臺分外朔風寒寸心祇與梅爭白
頗覺蒼顏稱鐵冠

江縣蕭條歲欲除溪山寥落野人居九重時復行寬令

金史卷四
使者徵求忍蠹漁

夜深風雪響侵門繡被熏來睡正溫忽念中林有樵者
獨慙餘煖未能分

久客霜風入緼袍壯心猶倚劒吹毛武溪溪上烏臺夜
猛虎一聲山月高

重題五友五首

竹

長日無風亦自清疎篁况復滿秋聲幾回睡醒窻前月

疑是瑤堦佩玉鳴

蘭

幾載栽培雨露深
好風披拂正關心
瑤琴一曲憑誰寫
惟有宣尼解此音

蓮

朝來微雨濕顰脂
並倚新粧照綠池
莫使香塵浣顏色
深情還有正人知

梅

金方山先生集 卷四
花正開時節已過祇留清影弄簷阿瀟湘千里客歸去
想憶花時思更多

菊

未到高秋有別情新叢簇簇傍階生歸心不待花重發
留與新知作眼明

董公二首

席捲三秦赤幟東力陳大義討元兇董公籌略應無敵
蕭相虛當第一功

紛紛豪傑欲興劉縞素應為第一籌何事元功盟帶礪
丹書不到董公侯

又題五友五首

竹

三年烏府長琅玕粉籜新梢次第看今日成林足風雨
坐聽清響徹雲端

梅

紅白雙梅戶外橫看花看葉興俱清今秋只恐歸期近

重疊題詩寄別情

蓮

鏡裏芙蓉一色開
高荷倚醉好風來
采芳誰識心如洗
持贈聊同驛使梅

蘭

幾歲南州老鐵冠
霜臺底物可為懽
祇應九畹滋新種
時采幽香滿把看

菊

簇簇新叢傍憲臺臺端有客日徘徊歸期若在花前發
留向新知次第開

懷沅州五友五首

竹

勁節虛心獨耐看霜臺三載伴清懽今朝朔北遙相憶
誰與蕭蕭共歲寒

梅

正是花時遠別離綺牕應已發新枝薊南臘月霜如雪

相對長吟有所思

菊

幾簇芳根遍小臺
自呼童子看澆培
沅江回首深如許
縱有清香亦自衰

蘭

頻除惡草惜佳叢
笑采幽香歲歲同
一自沅江騷佩遠
小闌誰倚看光風

蓮

方塘紅錦日熹微，絕愛天葩照客衣。
幾賦新詩去雕飾，相思重覺賞心違。

又懷五友五首

蓮

誰識當年周茂叔，愛蓮別是一般心。
沅州憲府花如錦，回首蠻山萬疊深。

菊

鐵冠不受晚風寒，采得幽香靜處看。
幸自托根今得所，

栽培應有露團團

蘭

九畹曾懷楚客騷不堪沅澧去人遙多情只有當時佩
別後清香尚未消

梅

紅白沅州有二梅年年長是近春開飄廊點砌今誰惜
祇有東風掃石苔

竹


栢臺清絕愛踈筵
踏影攀枝繞砌行
衛水舟中風雪夜
夢回疑是打窗聲

博浪沙

大眼由來視獨夫
悲懷忠義報兇渠
英謀已自輸曹沫
只恨當時中副車

院中楊柳

去日庭中始見栽
既成林後客歸來
春風擺盡輕狂絮
留得清陰滿憲臺



敬軒文集卷四